

Nr. 3036 prot.
24.11.2021



REPUBLIKA E SHQIPËRISË
KUVENDI

AMENDAMENT I DEPUTETIT

TITULLI I AMENDAMENTIT: RRITJA E BUXHETIT NË PROGRAMIN
BUXHETOR” ZHVILLIMI RURAL” TË MINISTRISË SË BUJQËSISË

KËRKUES:

Znj. Monika Kryemadhi

Deputet i Kuvendit të Shqipërisë

OBJEKTI:

**“PËR DISA NDRYSHIME NË PROJEKTLIGJIN
PËR BUXHETIN E VITIT 2022”**

BAZA LIGJORE:

Neni 75 i Rregullores së Kuvendit të Shqipërisë

ARGUMENTIMI I PROPOZIMIT:

Buxheti i vitit 2022 sa i takon ministrisë së Bujqësisë dhe Zhvillimit Rural, në kundërshtim me pritshmëritë dhe situatën aktuale ekonomike të bujqësisë shqiptare ka pësuar si rrallë herë një rënie prej 2%.

Me prezantimin e buxhetit nga ana e Kryeministrit dhe e Ministres së Bujqësisë, është deklaruar se mbështetja për programin buxhetor të “Zhvillimit rural” të Ministrisë së Bujqësisë, do të jetë 7.1 miliard lekë.

Ky deklaram nga ana e kryeministrit nuk është i vërtetë, dhe ka krijuar konfuzion në këtë sektor.

Pasi kam shqyrtuar buxhetin dhe tabelat përmbledhëse të cilat i bashkangjiten këtij buxheti, kam konstatuar që fondi për zhvillimin rural me qëllim mbështetjen direkte të fermerëve, në të vërtetë është vetëm 3.2 miliard lekë.

Kjo shumë korrespondon me zërin 606 "Transferta për buxhetet familjare dhe individët" në tabelën 5 shoqëruese të shpenzimeve sipas institucioneve.

Gjithashtu në prezantimin e buxhetit nga ana e Ministres së Bujqësisë në komisionin e veprimtarive prodhuese, në faqen 2 paragrafi i fundit, konfirmohet sa më sipër. Në të njëjtin procesverbal, në faqen 6, Ministrja e Bujqësisë informon deputetët se nga shuma 3.2 miliard si mbështetje direkte e fermerëve, shuma prej 1.04 miliardë do të shkojnë për skemën e naftës falas për punimet e mekanizuara. Si rrjedhojë, mbështetja direkte e qeverisë shqiptare për skemat mbështetëse në sektorin e bujqësisë ngelet rreth 2.2 miliardë lekë ose afërsisht 18 milion euro.

Duke patur parasysh rëndësinë kombëtare të sektorit të bujqësisë si një nga kontribuesit kryesorë në ekonominë shqiptare me rreth 20% të GDP-së, konstatoj se mbështetja buxhetore prej 2.2 miliardesh është tërësisht e pamjaftueshme për këtë sektor. Duke patur parasysh dhe pasojat e pandemisë është në kushtet e mbijetesës.

Sa më sipër, duke patur parasysh dhe deklaratat e kryeministrit, i cili në të gjitha daljet e tij publike ka insistuar që mbështetja direkte për fermerët në programin buxhetor të "Zhvillimit rural" është 7.1 miliardë lekë, kërkoj që në projektligjin "Për buxhetin e vitit 2022", të shtohet shuma prej 4,9 miliardë lekë.

Kjo shumë duhet t'i shtohet programit buxhetor me kod 04250 "Zhvillimi rural duke mbështetur prodhimin bujqësor blegtoral, agroindustrial dhe marketingun" në totalin e shpenzimeve korrente.

Gjithashtu kjo shumë prej 4.9 miliardë lekësh duhet të pasqyrohet në zërin 606 "Transferta për buxhet familjar dhe individët".

Kjo mbështetje e tillë buxhetore do të ndikonte pozitivisht në të gjithë sektorët e bujqësisë dhe blegtorisë shqiptare.

Duke qenë se dhe vetë kryeministri, në çdo takim publik si dhe deklarata zyrtare është shprehur se mbështetja direkte për fermerët do të ishte 7.1 miliardë lekë, atëherë shumës aktuale prej 2.2 miliardësh lekë , që është realisht mbështetja e parashikuar në këtë buxhet, në qoftë se do t'i shtohet dhe shuma e propozuar prej meje prej 4.9 miliard lekesh, atëherë do të ishte ekzaktësisht shifra e deklaruar nga vetë kryeministri.

PËR KËTO ARSYE:

Në mbështetje të nenit 75 të Rregullores së Kuvénit të Shqipërisë, ku specifikohet se: *“Çdo deputet ose Këshilli i Ministrave ka të drejtë të paraqesë në seancë plenare amendamente për projektligjin ose ndryshimet e propozuara nga komisioni përgjegjës, me kusht që ato të jenë të regjistruara paraprakisht në sekretari të paktën 24 orë para fillimit të seancës plenare dhe t’u jenë shpërndarë deputetëve të tjerë”,* parqes amendamentin sipas Aneksit 1 bashkëlidhur. Ky amendament do të prezantohet nga një deputet.

Duke e vlerësuar shumë të rëndësishme zhvillimin e bujqësisë, si dhe duke e vlerësuar si thelbësore për ruajtjen e marrëdhënies së besimit midis shtetit dhe qytetarëve, duke përfshirë edhe përgjegjshmërinë e Qeverisë në mbajtjen e premtimeve elektorale, propozoj miratimin e këtij amendamenti në seancë plenare.

MONIKA KRYEMADHI



ANEKSI 1

Në projektligjin “Për buxhetin e vitit 2022”, të bëhen ndryshimet si më poshtë vijon:

Neni 1

Në nenin 1 ,të shtohet pika “Për buxhetin e vitit 2022 të shtohet shuma prej 4.9 miliardë lekë të. programit buxhetor me kod 04250 “Zhvillimi rural duke mbështetur prodhimin bujqësor blegtoral, agroindustrial dhe marketingun” në totalin e shpenzimeve korrente të Ministrisë së Bujqësisë.

Kjo shtesë pasqyrohet në të gjitha nenet dhe anekset e ligjit.